

林初文詩文全集

林初文詩文全集

明福清林章

男君遷編次
古度

賦

秋征賦

癸巳之歲林子將歸沿河涉濟沂江泊淮泛
百川之瀕洞霖九旬之霏霰望流星而東指
託浮雲以南飛於是白氣分秋青山向暮

輪當湖孤帆在渡感風波驚節序張平子動
其四愁宋大夫爲之一賦辭曰何馮夷之不
靖兮樓禁伯以相戲矧勾龍之失馭兮致化
蛇於爭馳十雨不需三霖以災九坎旣滲四
瀆迺溷龜鳧之野無草江漢之民其魚尾閭
泄之穴小精衛填之石多魃不止鯀難治堪
教夸父飲豈待相繇吹邇其涔涔乍休汜濫
未歇霓霧不開莽蒼無竭鳥棲兮巖阿魚遊

兮木末四鰲蕩兮山欲漂九鳥沈兮日不出
眺孤城兮微茫下千里兮儵忽森綠汀兮何
之采白蘋兮難越煙波暝兮傷客心風露爽
兮驚人骨攬羅衣兮悵清宵艤蘭橈兮待明
月旣而榆光亂發桂影漸流玄官入息素娥
出遊空明鏡展波淨珠浮江山朗而疑晝雲
海混以爭秋清搖玉宇三千界涼浸瑤京十
二樓無處擲空中之杖何人吟渚畔之舟織

女迷於漢沼麻姑失其瀛洲庾元規翫之而
恍惚張博望泛之以踟躕廼有五陵俠兒三
輔貴客維飛廬於上陽連畫舫乎中澤舉芳
尊兮發清音揚微瀾兮弄皓霸賞十分罰一
石愁明朝娛今夕但知齊客食有魚那論魯
史書無麥若夫騷人適楚遷客辭秦離家萬
里去國孤身拏芙蓉乎江潯咏蒹葭於河濱
盼東山之皎月思西方之美人徬徨兮失羣

離罔兮迷津願捐珎以遺下女敬沈璧而告
明神又有吳娃若蕙越妓如蘭當年少恨對
景多歡憐三五之素魄矜二八之朱顏爭疑
粧而待照故徙倚以臨瀾翠影落兮川媚鸞
聲徹兮雲閒悅水天兮漾漾鬪人月兮團團
若夫蕭關戍婦徐隣處女年年擣衣愁夜夜
分燈苦銀河兮斷橋玉門兮極浦錦字慘乎
題雲綠窻潛其拂雨獨登樓疇倚柱生憎蟾

影之窺幃不喜苔痕之入戶又有離亭十里
陽關三闕王孫未歸公子乍別想故人之清
光惜異鄉之佳節舞桂樹之婆娑歌漢流之
嗚咽悵潺湲兮不回愁團團兮易缺攀瓊樓
以將顛擊蘭漿而欲折至若菊卽萬井粉社
千家籬傍繫鷁竈裏產蛙桑婦之曲自怨瓠
子之歌孰嗟有所畏其如虎無所逃而之蛇
桃華兮菜色白骨兮黃沙控織阿今天上啼

夫諸兮水涯嗟夫雨暘失時陰晴易紀得喪
殊途懽愁異旨樂莫樂兮伊人悲莫悲兮之
子將致怨乎江妃抑爭憐於月姊矧夫天南
介士海內狂生進慕圖麟之寵退希吐鳳之
名敢云范叔乃作虞卿不誇赤仄豈怨華平
十獻賦三譚兵長纓不可請短棹欲何征過
沛兮心愴渡淮兮目驚泛牛渚兮魂蕩瞻龍
門兮涕橫自傷蟠水誰歎浮萍乍興哀於魚

驚況蓄憤乎鯨鯨於是倚逍遙臨瀛滄望嬋娟
娟咏窈窕獨鶴唳兮寥寥孤鴻征兮悄悄熠
燿飛而過水兮搖搖蟋蟀啼而上船兮嫋嫋
聽微吹之生蘋坐斜暉於映蓼但覺夜多寒
不知天欲曉旣而紅星度河白露下坡東方
喻矇北望嵯峨村雞不唱城烏自呵林子有
感乃爲之歌歌曰山羅羅兮水番番草木衰
兮魚龍多涼風起兮月沉波行路難兮愁奈

何

傷春賦

青春兮冉冉綠草兮深深衆遊兮此土獨余
兮傷心徘徊兮江上惆悵兮日陰上高兮采
荼下低兮摘苓棘刺兮我履藤牽兮我襟欲
渡兮無梁欲鼓兮無琴騏驎兮伏櫪駑駘兮
騰岑鴟梟兮入幕鳳皇兮巢林菲菲兮成錦
澆澆兮鑠金四顧兮戚戚何處兮登臨徜徉

兮無與結縉兮不禁

思美人賦

月以仙蛾皎星以帝子明霜以青女冷風以
六姨清山以瑤姬秀水以宓妃靈桃以武陵
勝柳以章臺名蓮以潘妃步梅以壽陽成鳳
皇以簫中死鴛鴦以被底情司馬得卓以益
著飛燕托趙而更輕龍以浦而劍合駿以臺
而骨行金以分而見鮑璞以刑而知荆余固

不如物敢望與人爭世雖無尤物豈無美人
生余之不遇能不煢煢

居幽賦

天宕宕兮地悠悠有一人兮獨居幽形容改
兮心不化長思君兮畔牢愁倚園牆兮望鍾
山山嶽翠兮雲流瀾目眇眇兮淚潺潺君之
門兮以九閭山之陰兮水之陽北風多兮淒
且涼旣下露兮復降霜氣凜冽兮心悲傷

林初文詩文全集

明福清林章著

男君遷
古度編次

五言古

莊誦

宣宗御製閔農詩采來曲有述

青陽動蠢蠢含氣就華滋念此好生情迺厯

吾

王思惓惓農與桑古帝獨重之三推而三灑
豈以貴故辭載耜頌芟芟采繁歌祁祁

王風一以降男女各興悲杼柚空自嘆稼穡
艱誰知而況

九重上皇然發嗟咨言念豳豳曲載誦閔農
詩洞洞造物心一想春風熙黍苗驚披拂衆
條忻噓吹矧彼陌上人執筐與秉鋌瓊葩結
精神玉露流膏脂洋洋王者言千載光六藝

願以兩章意長擬七月詞九種與八蠶一一
春無私野穀看旅穗虬蕭誇成絲年年歌皇
豐不羨漢光時

古意

南山有蔦蘿北山有松柏本意相纏綿無奈
枝條隔

其二

新藕根自香舊藕絲自長絲長妾難斷根香

郎莫嘗

古相思

出門有相思
入門有相思
一蘿纏一葛
往來無斷絲

其二

相思復相怨
相怨復相憐
一蓮生一蕙
甘苦自相煎

寄情

儂似金臺月歡如玉河水月可照歡前水不
流儂裏

其二

儂生不如柳歡情那似春春風與柳樹年年
是故人

關山曲

行行復行行關山落日明客情似春草無處
不蔓生

其二

去去復去去關山無盡處馬蹄如流水不肯
爲人住

自君之出矣

自君之出矣春山翠黛薄本是望夫山顏色
容易落

其二

自君之出矣秋浦生寒水本是女兒浦滿地

相思泪

秋閨

秋月何娟娟一輪冰鏡冷人心照不見照見
人孤影

其二

秋雨何瀟瀟五更滴紅葉滴滴葉間紅可以
比啼頰

秋思

不知秋何如清風發天籟細細入珠簾輕輕
動羅帶

其二

不知秋何如明月照人寢上照鳳皇翠下照
鴛鴦枕

其三

不知秋何如朝雲一片自半是巫山魂半是

湘江魄

其四

不知秋何如夜雨生點滴
滴滴芭蕉紅點點
梧桐赤

其五

不知秋何如吳山淨寒碧
日出望鄉臺月落
望夫石

其六

不知秋何如楚水漲遠涉南去
越江颿北去

淮河繼

其七

不知秋何如花開盡清絕蘋花白於脂蓼花
紅於血

其八

不知秋何如草長紛可采蒺藜可以食薜蘿
可以佩

其九

不知秋何如鳴虫先解意長聲擣衣篇短聲
織錦字

其十

不知秋何如飛鳥獨歸早二月玉門關八月
金陵道

月望

簾發望團圓攬衣不成寐幸此對清輝翻令
心如醉床頭蟋蟀生枕邊茱萸墜零露下長

河天上人間淚

白菊

秋風吹孤標胡不涼颯颯
寥寥有歲寒心所以
芳華雖素繁生馨香冶容羞雜沓
眷此如佼人
羅之近
吾楊相對時
一林嗚然不言合

團扇詞

團扇復團扇宜障芙蓉面
只恐秋風來化作
西飛燕

踏青詞

新繡軟羅襪試步春郊外
雙雙陌上來草色生裙帶

方石篇

一片清輝在端然一掌平
霞章千古濕金錯百文生
擊之聲偏壯捫之質自英
美人難坐久得月便開觥

林初文詩文全集

明福清林章著

男君遷編次

七言古

擬古四愁

我所思今在大壑欲往從之兮十日作側身
東望涕沾芍美人贈我無底琴何以報之若
耶金路遠莫致倚嶽岑何爲懷憂心煩淫

其二

我所思兮在零陵欲往從之兮九疑橫側身
南望涕沾衡美人贈我紫文貝何以報之綠
蘭帶路遠莫致倚慷慨何爲懷憂心煩潰

其三

我所思兮在穆陽欲遑從之兮流沙涼側身
西望涕沾芳美人贈我雙蛇珥何以報之五
花綺路遠莫致倚逶迤何爲懷憂心煩靡

其四

我所思今在羽澤欲逞從之兮鄧林黑側身
北望涕霑慧美人贈我華留駒何以報之文
岳魚路遠莫致倚躊躇何爲懷憂心煩拏

四招詩

雲容容兮水悠悠懷美人兮蓬萊洲蓬萊森
在天際頭河光海色寒相繚青峯一點趨鰲
浮滄波幾度落桑流美人不歸我心愁麻姑

信斷海門秋

其二

沅芷發兮澧蘭開
懷美人兮瀟湘隈
瀟湘三月草每每
極目千里春心摧
波搖洞庭風雨來
山斷衡陽鴻鴈回
美人不歸我心哀
江妃何處水如苔

其三

攀琅玕兮來薺葵
懷美人兮崑崙丘
崑崙直

一何遙遙玉京只尺非人期白雲夢隔闕風
臺青鳥愁飛弱水涯美人不歸我心悲蓬頭
一笑天風吹

其四

斗有柄兮箕有梁懷美人兮崆峒鄉崆峒一
去連大荒春風不度高雲涼雪花六月飛空
桑沙草千山散夕陽美人不歸我心傷女娃
叶斷月茫茫

偏側吟

偏側偏側復偏側山高水深路如棘千聲萬
聲鵲鵲啼都說與君行不得

君馬黃

君馬黃臣馬白同自渥洼來異神亦異色今
人相色不相神鹽車壓殺玉麒麟

望夫石

妾貌不如花妾心原似石關山忽斷魂烟雨

長留喚那作天南二月鴻將雛飛去啼郎側

望月詞

月在上人在下欲往從之雲難駕月在東人
在西欲往從之水無梯

芍藥荅牡丹

君爲王我爲相君未開時我不開從教風雨
枝頭盡可憐紛紛桃李花輕紅淺白占春華
春華未半去如水那能留到君時死

鳳仙花

鳳仙花鳳仙花西風吹去到誰家不怨西風
吹花去但愁花去落泥沙

別離歎

天上月圓復缺月缺有圓時人生長別離吁
嗟乎人生長別離

寄情

長相思兮東山月月自東生向西沒妾在深

閏十六季十時見月九時闕

其二

長相思兮西河水水流千里復萬里流到平
時也轉頭郎心一去何時止

淮南道中元夕

昨夜張公渡船頭月如霧今夜朱家橋馬首
燈如灩可惜春光能幾度年年客裏度春宵
歌者吳玄真以畫美人二幅索題時在

潛故爲之賦潛各二章嗟乎非有心人孰知此者

潛之山兮高嶙嶙彼美人兮美如荀自我不見于今三春

潛之水兮深瀏瀏彼美人兮美如菟自我不見于今三秋

潛之山兮高復高彼美人兮美且褒匪我思存心焉嘈嘈

潛之水兮深復深彼美人兮美且情匪我思
存心焉淫淫

蛾眉篇

團團皎月出秦淮片片涼風入漢街黯黯蒼
苔上繡戶瑩瑩白露下瑤階飛雲渺渺燕山
際落木蕭蕭楚水涯樓外嚶嚶鴻鴈陣燈前
寂寂鳳凰釵鳳凰分處花盈島鴻鴈來時霜
滿草千里蒹葭白鷺洲一聲鷓鴣丹楓道此

時玉塞不勝愁此際香閨無限惱錦字重重
和淚封寒衣疊疊連聲擣擣衣爭自寄征夫
對字憑誰送遠途燕子磯長飛夢共桃花塢
冷斷魂孤漢陽有客悲窮鳥虞坂無人惜伏
駒君自他鄉栽草荔妾從何處采藤蕪憶妾
髮如霧憐君角已露八歲詞鋒飛十歲詩葩
吐立馬能將韓子題牧羊解把蘇卿賦未論
掘甕過松陰已報探鑲傍桑樹十二揚鞭走

上開十三獻策論平蠻花迎紫燕明珠絡柳
拂白虹响玉鐙一望斗牛生寶氣五陵裘馬
失華顏不誇千草錦囊底却驚一箭畫屏閒
畫屏掩映芙蓉褥錦囊點綴鴛鴦曲纏綿繡
結一團心綽約絲繩雙裊足得壻共言似羅
敷愛夫自信如弄玉琉璃暮暮蘭膏紅琥珀
朝朝竹葉綠竹葉蘭膏綺閣東鸞簫鳳吹綵
樓中自未登山和臨水更曾怕雨復愁風無

端題柱別司馬無端舉案送梁鴻
蛺蝶園中飛款款驪駒門外唱
匆匆匆匆自當去款款誰堪語
舉手牽羅衣低頭吞玉筍今年
雁叫北門涼明歲鶯啼東嶺曙
昨日南風撲荔枝今朝西港吹
蘆絮千山萬山夕陽時長亭短
亭芳草處雙龍潭外越王城五
虎峯前漢官署漢署天香動桂
柯越城秋艷擁姮娥新郎文
史三冬足故國風雲一日多只
謂青錢選

易中詎知白雲調難和一從周宴誇聽鹿幾
度秦臺笑畫蛾蓮萼開遲寧敢怨柳條折盡
不堪歌卻生不爲黃金也卞氏其如白璧何
白璧獨懷國黃金多結客年年王孫遊處處
仙郎謫五嶽峰烟屐下青十洲水樹尊前碧
邊霜襯馬踏三陵峽雨吹颿浮七澤澤國跨
天梁陵原繞帝疆雲霞三楚態花草六朝
香紫陌胭脂井紅樓錦繡坊結廬種修竹閉

戶掃長楊他日聞詩禮少年誤文章枇杷空
自巧翡翠向誰光短鋏羞彈暖長裾懶曳陽
感時聊避地懷古更思鄉自恨不登徐庶薦
自慚不入陸宣莊一朝忽作陳翔黨千載能
令林類傷林類翹翹徒自許陳翔烈烈終何
補錯將蕭艾作蘭看落得鴟鸞爲雞侮樊上
自多蠅市中寧有虎倘教郭解請公孫翻把
彌衡送黃祖黃祖乘船事莫論公孫開閣意

猶存不妨慈母曾投杼何事孤臣尚戴盆夫
壻豈無三寸舌 君王却有九重門繞梁不
及漢家燕焚木那堪楚國猿楚國當年貴薪
食漢家此日賤耕織令丘谷口鳥啼魂析木
津頭雞拂翼幾處長河無水聲幾處平原無
草色陌頭人哭塵昏黃市上鬼號霧晝黑倚
柱悲愁若得知當墟新苦誰曾識忽傳一疏
凜飛霜豈謂三章深入墨假虎吼街頭驚蛇

伏草側含沙真可傷下石轉堪惻三十月來
盡風波四千里外絕消息却思少小貌如花
那爲艱難心似蕙心似蕙獨在天南望地北
貌如花誰教秋色送春華秋煙一片直秋雨
幾行斜秋樹多驚鳥秋江總斷霞白雲樓上
雲如水明月亭前月似沙十竹娟娟手移在
百花瓣瓣眼看差蜘蛛當戶網蟋蟀傍窓紗
數節三經菊歸期兩悞瓜篋中悲樂子鏡裏

憶秦嘉但見門前畫羅雀不聞戶外夜啼鴉
啼鴉天色寒羅雀人情冷日日怕黃昏夜夜
惜清景迢遞倚銀河淒涼立金井一庭白榆
光四壁頰梧影梧葉飄飄空似紙難將題字
傳夫裏榆花歷歷不成錢安得買書放兒前
宮漏悠悠歌舞夜隣春悄悄亂離年始知白
屋郎偏苦更信綠窓女可憐可憐當杼柚偏
苦下帷幄縱使萬卷藏不如千金握高鳳嚇

鴟鵂大鵬笑蜩鷲殺人端是用蠛蠓生子底
須誇鸞鷟夜郎放李豈無才天祿投揚非不
學蚕室羞生太史遷馬門餓死東方朔直鉤
難下綸曲木不爲楠暗道莫投珠明時寧買
玳玳鼠未堪猜珠鵲却須裁涸鱗得水終生
浪伏蟄乘春定作雷乍報西師起復傳東寇
來鼓輦沸鼉窟烽火暗龍堆市井新兵動桑
麻舊稅催賈生初下涕郭氏未登臺撫髀應

慨慷握髮正徘徊
食客不嫌收狗盜
消人詎肯棄龍媒
佛輪窅窅三身轉
帝網恢恢一面開
晉子有能終受塊
韓郎何罪不然灰
妾今不恨月邊月
長倚月華瞻漢闕
妾今不怨山上山
遙隨山色盼燕關
勸君莫羨鳥中驚
驚爲愛毛暎水絕
勸君莫笑草中葵
葵能衛足向陽欹
關上寒來早客邊
衣到遲床頭知易
盡帶眼怕頻移本
是浮雲壻寧爲孟
浪兒且

看梁畔枕莫論橘中棋禍福門無向窮通路
有岐青雲半流落紅顏多別離茂陵風雨千
秋夢楊子波濤一夜悲也道儂家非鳳頸那
知郎輩是蛾眉

畫江山歌贈周如言

吁嗟乎周君畫太奇乾坤筆下移披圖誰不
快掩卷我應悲悲莫悲今行路難千山萬水
不堪觀悲莫悲今交態惡輕雲薄雨何須作

悲莫悲兮游子情萋萋春草爲誰生悲莫悲
今思君處漠漠寒江流底事一幅生綃萬里
天遠看如水近如煙輞川不獨王摩詰嘉陵
何必吳道玄爲君歌君莫訝聞君能移神勸
君莫輕畫勸君畫鬼莫畫人人面無如鬼面
真勸君畫今莫畫古古人多比今人苦勸君
莫論白和青青白誰能眼底醒勸君莫嫌脂
與粉脂粉最宜臉上溷爲君歌君莫笑我亦

有畫筆與君不同調我能妝點星日間星日
嵯峨不可攀我能布置山河裏山河迢遞無
由從我能畫虎未安牙只道安牙便可誇我
能畫蛇復添足卽知添足翻爲辱湖海却逢
君筆精妙入雲願君爲我畫使我生氣氤氳
我一片愁肝腸試教烈士日邊望畫我幾年
病顏色可與美人天外憶畫我身上一貂裘
灑灑紅塵未足羞畫我腰間雙龍劒峻嶒紫

氣何曾玷爲君歌君莫妒我本無修眉不覺
向君露古來物色須良工廊廟江湖人不同
于今 聖主方延攬莫置英雄丘壑中君不
見商家求傳說霖雨起巖穴又不見漢室訪
嚴光星辰動廟堂知君能繪麒麟閣念我不
入芙蓉幙男兒有志不逢時感此令人空淚
落吁嗟乎淚染丹青濕不枯關河分手夕陽
孤却愁明日重相見一卷江山是戰圖

小山篇贈淮上王隱君

淮水平平山突突淮月亭亭風發發王君結
廬離之東占斷山水和風月月明夜夜當君
門憑君相對酒盈樽風光歲歲入君戶爲君
吹開花滿樹水聲日日傍君琴與君調出太
古音山色時時迎君屐願君留下千年跡夢
君色相生來全羨君名利脫除偏纔了齒
昏嫁債便結玄真漁樵綠丹竈陰陽火

內外篇鷓鴣居宴宴蝴蝶夢便便旣種林間
杏亦栽社裏蓮數頃白雲小隱地一聲清磬
大羅天我本煙霞人猶作風塵客幾過王孫
祠未識仙翁宅昨日尋君度翠微蒼苔一徑
引柴扉昨夜伴君坐青幌綠蘿四壁流蛩響
霜華結曉嵐星彩散寒曇啞啞鴉啼井寥寥
犬吠菴烹茶掃葉爨沽酒穿雲擔紫蟹肥當
筍黃花瘦傍簷道從醒處解禪向醉中叅不

作鍾山勒聊爲碣石譚主人能投轄客子媿
停驂黯黯辭雲壑飄飄出月潭懷珠光滿袖
采藥香盈籃未道青牛過尹喜已隨白鶴見
蘇耽當時窮鬼空留五今日病魔忽去三却
是十年游海內不如一度訪淮南

杏林篇贈余醫士

君術輕扁鵲我病多司馬相逢淮水濱宛在
衡山下論交固有緣濟世豈無詮甚爲小兒

苦幸得丈人憐念我命不偶遭此陽之九謗
譽總由箕死生那在斗曾讀止桑詩寧歌種
豆詞涸魚未足歎窮鳥廼何悲朝飲芙蓉露
夕宿薜蘿園七情旣中摧六脉因外驚豈無
火棗丹與彼冰桃尤不奈心長熱况茲膽尚
寒感君九折臂爲我一揮淚授以隱景方投
之降氣餌一鍼窮鬼號再砭愁魔逃三湯已
易髓四火將伐毛拍拍楚魂起恬恬越吟止

那知盆下人忽見壺中子吁嗟夫道不孤君
能療國終須試我欲殺身何所圖願借赤霞
鼎爲開白虹影先刳共工腸後斷單于頸真
人本自識英雄烈士安能受困窮但使姓名
麟閣上敢忘功果杏林中

春城行

少年遊冶春城曲春風爛熳芙蓉褥一時相
見便相憐君貌如花我如玉君今作婦落娼

家我猶爲客滯京華只此相看可相泣何須
江上聽琵琶蛾眉自古有人妬寂寞長門誰
擬賦落花流水自年年青春總被紅顏悞感
君相念轉相悲淚滿闌干不敢垂幾度徘徊
花下立鶯啼宮樹夕陽時

少年行

君不見長安俠少年酒底高歌花底眠
走馬千金散何曾盜箇官家錢一朝忽報邊

烽起從軍不待別妻子但言割地與和親不
愁戰死愁羞死

斷腸辭

有引代

余旣得劉文姬十二年然後出吳楚
間因歸閩不幸失意羈留再歲劉死
而不得訣焉余感其當時棄富貴同
憂患之情自叙以哀之蓋腸不斷則
哀不可止也故名之斷腸辭

嗚呼詹郎殉寵楚倡伏志委分不齊鍾情並
至相彼卉木紛其妖思誰謂風塵而無嫵致
煙花之業風流之崇自昔悲之於余何怪憐
才若貪感恩如醉天之生余羗與人異余也
若蓬飄然四出蚤歷荆吳轉投燕冀走馬章
臺搜紅揀翠十里垂楊莫余挽轡豈曰無芳
維蒿與艾爰獲我劉如采草荔言貫其蘂終
身是被彼蒼者天亦人之忌間余之虞奪余

之美生會何難死別何易撫今追昔實傷余
意我思劉卿燁如舜英錦心繡口蕙質蘭情
耿彼靈鳥下集于荆不得其儀載飛載鳴平
康之巷校書之營枇杷花下月影惻惻金環
隔面珩佩有聲愛而不見搖我心旌婉婉隣
嫗導余于行王生何幸廼見盈盈半睇含嬌
一笑成盟招我迷香兩聽商庚倡予和之如
吹鳳笙夢耶真耶令人忻驚玉杵未獻璫藥

已傾余心懷之百感斯生丁丑之春三月之
暮卜余于歸兆曰宜家賦彼標梅徵我匹鴛
鵲彼北里登我西序如鳳離筵脩脩其羽何
以御之鳴鸞振鷺燕爾新婚枕席未昀風雨
飄飄我家如蠹顧瞻周道厭浥行露內外之
人興心嫉妬余分乖離哀此中路卿乎何苦
惟余之故蒼蒼女貞載歷冬夏人亦有心豈
改初態堇荼可殮風波可步安樂未忘寧辭

恐懼掩涕向余再拜以訢謂妾不才願爲荆
布佐余一室惠余諸嬾習余士風有如其素
卉棘之花青棠之樹婷婷植之于余之圃紅
拂之標繡襦之度于彼青樓中流之柱一閣
西偏繞以蘅荃左經右識前簫後絃緇冠縞
服舉止聯娟乍雲乍雨非人非仙暮暮朝朝
一十二年祝茅拜斗爲余專專旣靜旣好亦
空亦玄功圓果滿舍余而先余遊于越而處

于燕三千餘里半月之間關河不斷烽火無
連鴈多魚足如何杳然不在會後不在別前
生南死北相望一天明珠可轉美人不還芳
草何怨王孫自憐余之余鄉言念桑梓一琴
一劒千山萬水思君如蠶其絲纏纏樂少愁
多身遐心邇傷此夢魂一夜萬里夜夜隨君
君不知矣嗟而喪母猶余喪子豈不堪哀云
胡而毀桃華之顏蘭閨之裏柳色驚目烏聲

通耳如澤之陂有荷維綺風霜搖之胡不蔬
蔬九月九日得書一紙余從日者問而休否
歲在困敦二星失紀與鬼入宮須女出軌于
相之月載眺之時帝將召而不待余只余心
搖搖行道靡靡木葉旣下涼風四起相將者
誰明月而已邇其聞訃初出南途扁舟夜雨
清明之隅睠彼蕭斯聽彼鳬雛一泪一涕湖
水爲枯朝涉錢塘夜渡姑蘇奔徐走充閭關

入都迎風流血隨冰落鬢登堂見櫝入房見
幃一簾絲網半榻塵鋪菱花不架寶鴨在爐
瞻形顧影目轉心紆恍兮惚兮生乎死乎號
之以鳳不應以烏千呼百喚竟成一吁雉雛
其匹鸞啼其孤咿咿奉倩愁哉須臾回首故
山白雲之區依牛傍女過江歷湖而魂余引
而魄余扶而母二氏一嬪一嫗而家旣零余
與支吾余兒未室余女未家余恩未報余怨

未圖余生一苦余灰百辜而亦無寧謂余非
夫余之出遊滿庭花萼兒兩牽衣婦三持爵
折柳以歌其音綽綽旣醉而別雖悲亦樂二
載歸來顧今非昨旣失余駒復亡余鶴薤上
之露一朝再落天乎何罪亦已太霄女蘿青
青兔絲幕幕兩草一心死生纏絡生不相依
死不相託嗟嗟伊人草之不若而病誰爲而
愁誰告而來誰遣而去誰迫枕墜菜萸欄生

芍藥豈能無功薤薤失約綠怨紅悲粉銷黛
別老母寘會大娘授握諸婢嬋媛罵余之薄
歎歎遺言聽之心斫蓋棺千古傷哉冥漠嗚
呼窮亡濟馥翠死毛嬌可憐香骨委化蘭泥
牡丹落兮桃李爲蕉鵝雛逝兮鶯燕成鶻有
金屋兮誰貯彼玉簫兮誰調春風浪蕩兮秋
雨寂寥啼乾鷦鷯兮滴斷芭蕉大婦余怨兮
小婦余驕一人余吊兮九人余笑天地可盡

兮金石可銷而不可作兮余思無聊余案乎
鰲兮江之堯青山如黛兮水如綃卜而佳城
兮鰲之杓上有木蘭兮下有臨魂乎歸來兮
樂逍遙無爲四方兮罹灾祲綠生離兮得死
別不相送兮勞相招商絃絕兮蠶嘒嘒茯苓
掘兮兔飄飄損斷腸兮哭不得蓮生薏兮苦
難消割我比翼兮痛至死願爲連理兮再生
條陽臺有路兮夢其余要玉京何年兮從君

以朝

余小字烏而劉名鳳故中有號之以鳳不應以烏云

怪

古潰切

艾

魚刈切

美

明秘切

家

古暮切

序

祥豫切

夏

胡故切

態

徒故切

婦

符遇切

圃

博故切

間

經天切

時

上紙切

家

攻乎切

告

說岳切

迫

卜各切

笑

思邀切

蹇掬行贈黃生

蹇掬復蹇掬一掬應一蹇一蹇魚翻荷上露

一掬龍擒海底珠一掬一蹇紅塵裡雲去雲

來月有無高搖搖寶彈風前逐鳥飄低拍拍

繡球雨裏拋花落輕盈盈二八佳人弄水晶
重挺挺一雙壯士扛金鼎疾復疾熊耳山頭
推石日遲復遲羊腸路口轉輪蹄上復下今
下復上拂水流星光漾漾東復西今西復東
漫天飛絮亂匆匆楚掬何風流流風滿帝州
場開湖海會社結神仙游長袖掃花雙掩胯
打來妒殺鞦韆架短歌對酒一摩肱抱去羞
將傀儡棚楚掬楚掬黃氏子紛紛兵法君家

起自從涿鹿斬蚩尤至今殺氣填胸底動靜
有圓機虛實皆完壘本是軍前跳盪才寧作
里中輕薄技君不見烽火照秦京漢卒三千
血滿纓又不見羽書飛遼海夷兵百萬霜連
鎧安得楚掬郎教戰出沙場盡令三軍士一
一萬人當伐鼓爭揚幟驅秦更渡遼坐使邊
塵寢行看島嶼銷凱歌入燕市論功上漢朝
奪却封侯印不數霍嫖姚胡爲乎楚掬者黃

河萬里無堅城紫陌千門有眞社 君王拊
髀已經年猶向塲中誇踢打

姊妹行

與姊別時啼頭比姊肩低幾年不見姊眉與
姊夫齊春蘭秋菊各芳澤花蚤花遲揔堪惜
生憎一對似花人惱殺十年花下客花時能
幾何客恨不勝多翻作相思樹纏絲復繞蘿
鴛鴦宿海底好夢落風波空有青衫淚雙彈

向翠蛾寂寂楊花塢迢迢桃葉渡長江南北
頭攄是相思路新人本非新故人應是故只
道相憐親上親那識相思苦中苦憶故如望
月望圓復愁缺憐新若轉絃一轉一纏綿纏
綿復纏緜見妹如姊面年年春風時那作雙
飛燕姊應山上采薜蘿妹莫尊前唱鷓鴣昨
日書來無別話爲儂珍重大姨夫

七夕歌

問織女會牛郎天上人間今夜長今夜見郎
應不苦那來有淚落如雨可惜紅樓乞巧人
金針綉線暗傷神有巧何不教人解却教人
倚闌干待織女答君不知人間天上不同時
一年三百六十日一夜光陰纔一息別郎日
長見日短見郎翻覺添悽惋萬恨千愁說不
了那得工夫教人巧月落霜飛河水灣相思
又見一年間惆悵東君情太薄莫恠淚來如

山落傷哉此語亦世情那知世情更不平世
人一別動十年一年一見未足憐關山南北
天之涯河東河西未足嗟驃騎關外侯生入
玉門不自由踴躍從軍子辭家却向邊城死
荏苒宦遊人青春踏盡化衣塵蹉跎商賈客
歲暮他鄉嘆落魄年年歲歲有離別春花秋
月成虛擲今夕雙星橋上渡不知多少紅顏
妒爲勸織女謾自惜郎當牽牛女當織從來

恩愛悞人多樂極悲生且奈何君不見阿房
宮雕闌玉砌野烟中又不見銅雀臺平蕪落
日起塵埃玉環未老恩先斷飛燕芳魂何處
挽百年夫嬾不長保牛郎織女千秋好織女
織女不須愁只今後宮三千半白頭織女織
女不須啼近來干戈滿眼多嬌妻

看花行

婉婉佳人折柳時翩翩才子看花日瑤琴寶

劍映華騶錦纜牙檣飛綵鷁勝別寧辭萬里
程壯遊已向九霄行楚江波帶吳雲動淮樹
霜含海月明趙俠交遊重燕豪意氣橫獻賦
未登丹鳳闕揮鞭先上絳龍城龍城鳳闕九
重表燕塞秦關百道繞雲連甲第鬱龍蔥星
列冠裳舒窈窕金水橋頭紫霧高玉河堤畔
青楊小千花爭發錦宮春百鳥齊鳴璫苑曉
天上奎光二月開人間較彩一時來祿觚喜

值唐虞世入棘爭誇董買才藍袍染柳彩筆
題梅東城隅北里曲十二樓臺倚玉京三千
粉黛藏金屋月照綺羅光風吹蘭麝馥擲果
滿香車解衣換醺醪一一清歌按鷓鴣雙雙
妙舞驚鸚鵡此時此際共相憐聯袂聯鑣各
後先鵬鳥搏風當海上虹霓吐氣向天邊何
人不在長安路盡得看花馬上旋

折柳行

莫折章臺柳柳絲多於藕莫看武陵花花蔓
長於瓜蔓長猶可挽絲多亦可綰惜哉此流
光一去不復返憶昔聯翩逐少年黃金絡馬
玉雕韉花底高歌柳底醉春風處處有人憐
憐君詞賦欲凌雲憐我意氣亦追電不勞狗
監薦相如寧向牛車囚管晏無端磊落十年
餘君爲伏鳥我窮魚相看却是雙龍劒夜夜
寒鉞射斗墟雲雨何輕薄風波苦太惡却作

短歌行歌向長安陌陌頭柳色年年新腸斷
尊前憶故人莫論生離共死別琵琶一曲總
沾巾

薄命解

妾與君俱命薄本是楊柳花隨風自漂泊宛
轉而今各嫁郎皎然寒梅照西閣君從任俠
兒妾事文章子任俠之兒輕風波文章之子
愛山水商賈累巨士封侯離別年年都有以

郎爲儂破家儂貧何足嗟儂許郎殺身郎別
何足嗔若然厭糟糠當初何以棄膏粱若然
嫌荆布當初何以拋純素若然厭朝夜當初
何以下臺榭膏粱未似糟糠清純素未如荆
布榮天長地久沒沒死朝朝夜夜未爲情無
以田百畝便當書五車無以帛千匹便易囊
一簞無以兒女悅便笑英雄別伊家不是薄
情真一朝富貴肯憐新感君爲妾愁妾心似

水無回流感君爲妾歎妾心非冰難中泮紅
顏但得附青雲風流不下卓文君爲君歌歌
一曲看君容貌固自華論君夫壻亦何辱當
初豈不驕翱翔今日何如怨躑躅爲君歌歌
再陳憑君寄語青樓人無謂脂粉腴脂粉是
畫圖無謂歌舞強歌舞是戲場無謂恩寵奢
恩寵是散沙無謂年光多年光是逝波婉孌
得嫁卽便宜莫教老大悔來遲君不見嶺頭

芳心獨向歲寒開
趁得青春便結子
人人道是百花魁
又不見陌頭柳青青
折盡遊人手
顚顚西風啼暮鴉
輕薄少年幾回首

秋風歌爲林丙卿祭劉文姬

有引

劉文姬以去年今日亡矣嗟夫秋色
重來紅顏不起百物代謝美人遂死
窮復一祭侑以短歌

看看明月度紅藥
君去洞房秋寂寞
忽忽悲

風生白楊秋來野寺君淒涼等閒別君君却
去思君淚滿芙蓉淑珍重望君君不來憶君
腸斷鳳凰臺鳳凰臺上秋烟白芙蓉淑畔秋
波碧秋空何處覓行雲傷心憐我復憐君憐
君不作秋河星夜夜揚輝入我庭憐我不作
秋原草朝朝引蔓上君道自分生死兩飄搖
君如流水我如漂一載悲愁只浪着十年恩
愛空波落更無粉黛生華幌更無笑語流清

響蕭蕭白露下丹楓恍惚秋山見靈爽幾回
月下夢相尋月華黯黯夜臺深幾度花前醉
自遣花枝寂寂春缸淡花落東風有出期月
沉西海有生時美人一去恩情絕可惜容顏
似花月別鶴休教琴上彈離鷺莫向鏡中看
愁人惟是相思絕思君况是悲秋節最憐動
竹秋風情最怕淋鈴秋雨聲秋雨秋風總相
惜綵雲渺渺無踪跡一日不見如三秋三秋

不見千年休黃腸終古閑羅綺白骨何年返
桑梓漠漠黃沙塞北路迢迢碧草江南渡江
南塞北兩家鄉魂去魂來黯自傷萬里山河
魂易徙一片關城夢難倚鐘沉古剎夜漫漫
木落新阡霜索索新阡白日自成村古剎黃
昏不掩門鬼火寒迷柳樹影佛燈孤照桃花
魂飛花柳樹想顏色不見美人淚橫臆五更
蟋蟀繞棺啼猶似紅閨催起織

聽琴歌贈武夷山吳隱君

有引

隱君住武夷善操琴予過而訪之其人古君子也爲操一曲絕非時調雍門師涓之流也君亦以予爲予期予媿不能從君隱時有事于燕臺卽復別去君索贈詩相與把論不勝感慨爲作此歌以贈

翠重重武夷之山六六峯青淥淥武夷之水

三三曲山之東水之西烟霞十里武陵溪溪
南風生有鶴嘯溪北月落有猿啼溪裏桃花
千萬樹亦有吠犬與鳴雞吳生何爾爾家本
延陵氏習隱落市廛恣遊徧山水載酒時過
雲谷傍携琴日坐幔亭裏玉笋秀色近迎眸
珠簾寒聲遙送耳蒼苔屐下磨白雲袖後拖
瀟灑禁不得縱飲發高歌歌喉未放指先動
摩娑却把青桐弄逐微來往走龍蛇應絃高

下飛鸞鳳一聲宮鐘撞曉山空一聲商筍咽
秋雲涼一聲徵流鶯轉花底一聲羽斷鴻叫
江濤一聲角何藐藐廣寒細度霓裳樂七絃
滾滾玉連環五音泠泠珠走盤一曲雍門難
爲和再鼓師涓不敢彈吁嗟吳生何惓惓
人能作古人音惜哉子期不復起千載聽之
傷我心我有四愁詩思君君不知我有一恨
賦送入人不顧憑君寫入朱絲絃奏之高山

最高巔因風直送到天上吹落玉皇香案前
願教玉女會我意爲我一問當時事如何謫
下三十年人間猶不知名字吁嗟夫男兒何
所求生不封侯死不休只今處處有烽火肯
把吳鉤私報讐君且抱琴住我將拂劒去西
出玉門關南入銅標柱一朝破虜復平蠻鳴
琴擊劒凱歌還取得金印大如斗與君同上

武夷山

鳳歌

十二闌干春如畫綠楊隱映鞦韆架人在迷
香第幾層大堤十里走蘭麝雲間公子千金
兒揮馬迎門風叱咤百寶樓頭拂落花千呼
萬喚從天下翠嬾紅嬌出瑤島纖蛾宿黑不
曾掃未知名姓已知心一笑春風散華藻橫
系縱竹羅龍津擁得玉山筵上倒舊曲新人
恐不宜琵琶翻按風光好朝朝朝暮暮在陽臺

花影東流羅帳蚤誰向攔門得碗羹也教夢
裏一回到可憐二人顏如玉紛紛豈是曳雲
屬莫論無情與有情風裏楊花難管束何人
不愛鳳皇詞何人不喜鴛鴦曲仙郎贏得惜
花心鎮日看花愁不足鳳兮鳳兮何燁燁幾
時飛落烟花劫十六年來毛羽嬌身藏金屋
心猶怯爲吟風竹愛郎詩闌怨獨裁薄命妾
早晚相逢却有期氤氲化作鴛鴦牒桃花三

月春光盞洞口桃花紅十丈初愁相見不相
知投到相知怕相忘從來驚喜千萬端分明
記得猶堪愴記得璫筵酒興濃詩成月倚闌
千望記得紗窗琴韻清曲終風入羅幃颺記
得長途送別忙陽關三疊含啼唱記得邊城
相憶遙層樓百尺扶愁上今年花好不同看
明歲看花又何向春去春來似水流相思那
得長無恙銀缸影裏繡籠前對面無言動一

聊不是多情總可知莫將猜作風流况鳳兮
鳳兮何落落朱顏不可黃金博卽看佳人水
上花那論遊子風前繹關家盼盼馬家瑤當
時才貌亦自若至今千載有人憐燕子之樓
梅花閣鳳兮鳳兮何殷殷鳴珂巷裏更無君
君今莫寄傷春曲郎情多似春空雲

鰲峰歌贈林隱君

君不見雙旌五馬驕如龍南走十里蜿蜒停

倨爲鰲峰又不見海壇中斷湯谷流千回百
折流入鰲峰之東頭鰲峰亭亭石竺傍時有
九鯉僊人來徜徉鰲水深深蓋特下鯨人泣
得明珠光照夜山靈水恠相激摩精爽欲奮
無奈何以茲鬱發爲英物降之君家二百年
魁礪之士星辰羅君本一豪人自號太拙子
旣雅嗜圖書亦癖耽山水意氣絕雲霓肝膽
照神鬼怒掉三寸殺公卿喜捐七尺酬國士

一擲百萬輸輒呼一飲十千醉卽死好客若
姬敦穀如芷云其昏姻比其隣里等霄壤于
菡華視軒冕以稗子有時放歌白雲鄉五湖
烟水變輝光有時拂劒紅塵陌五陵裘馬助
顏色笑劉項之空陵哭陳隋之故城謁釣臺
之高叟訪竹林之狂生吊嫫姿而過軼誅靈
均以浮荆謔方朔咏長庚奴僕乎計然倚頓
而執牛耳于朱郭之盟吁嗟太拙何太豪况

兼文雅涉風騷左持玉斗右寶刀世間誰復
男兒曹磊磊不負鰲峰高磊磊不負鰲峰高

五苦歌

苦苦苦守錢虜兄是孔方妻阿堵但爲兒孫
作馬牛那識英雄是龍虎苦苦苦守錢虜傀
儡能笑啼混沌解歌舞不見銅山陷作坑不
聞金谷填爲土海中魚腹大於舟井底蛙聲
空似鼓苦苦苦守錢虜蒿里在前門邨山在

後戶百歲有閭王千年無彭祖其奈豚犬臂
不爲田宅主麥飯難登黑土堆紙衣誰送黃
泉路苦苦守錢虜生與銅俱臭死隨草同
腐縱有萬條絲邊昏終成一箇門上午苦苦
苦守錢虜

題林丙卿劉姬玉神主

入時倒郎懷出時對郎面隨郎南北復東西
芳草天涯堪遶徧勝寫丹青圖勝粧水月殿

玉魄與香魂都在這一片願作巫山頂上雲
願作廬家梁上燕莫似生前輕別離教人看
作班妃扇

水竹篇

緊惟水竹涵秋灑玉可以洗心不可使俗下
有錦鱗生上有丹毛宿吁嗟乎莊子周王子
猷高士兼之稱至足

雜言二首

莫作官莫作官殺人容易救人難六月筆鋒
寒

莫讀書莫讀書幾人能辯魯與魚一世白頭
虛